

2004KO OTSAILAREN 26KO **OHIKO OSOKO BILKURA**

Lazkaoko Udaletxean, bi mila eta lauko otsailaren hogeita seian, arratsaldeko zazpietan, Lazkaoko Udal Osoa biltzen da, aurrez honetarako deialdia egin delarik, Felix Urkola Iriarte Alkatearen lehendakaritzapean, ohiko batzaraldia egin asmoz.

Bertaratutako zinegotziak honako hauek dira: Igor Sarriegi Zumarraga, Xanet Barreras Jauregi, Arantxa Zumelaga Agirre, Inazio Barandiaran Aldasoro, Amagoia Naldaiz Mingo, Kepa Goenaga Alikostes, Xabier Arrasate Aierbe, Gorka Lamy Insausti, Juan Manuel Serna Portugal eta Angel Olaso Villalba.

Aktan adieraziko da Inazio Estensoro Eskisabel zinegotzia bertaratzen deneko unea.

Idazkari lanetan Iñaki Eskisabel Zurututzak dihardu.

Alkateak esaten du Eguneko Gai Zerrendatik kanpo Irantzu Amundarainek, Areria-
ren izenean, izenpetutako mozioa eta berak izenpetutako mozioa alternatiboa aurkezten
dituela Osoko Bilkurara eta presazko izaeraz Eguneko Gai Zerrendan barneratu eta trata-
tzea planteatzen duela.

Olaso zinegotziak (PP) esaten du gai politikoa izaki Eguneko Gai Zerrendaren
barruan joatea ez duela oso komenigarria ikusten baina gehiengoa alde baldin badago
bera ez dela aurka azalduko.

Alkateak erantzuten dio gainontzeko mozio politiko guztiak ere Eguneko Gai
Zerrendaren barruan joaten direla eta hau ez egotearen arrazoia Eguneko Gai Zerrenda
egin ondoren iritsi zelako dela eta berak bai ikusten duela orain tratatzearen beharra
hurrengo Osoko Bilkurarako utzi gabe.

Guztiek bere adostasuna agertzen dute mozio hauek Eguneko Gai Zerrendan
sartzeari dagokionean.

I.- ZINEGOTZIAREN KARGU HARTZEA.-

Alkateak esaten du zinegotzi berriaren helbidea ezin izan dela lortu eta beraz ezin
izan zaiola jakinarazpena egin. Bere alderdiari, P.S.E./E.E.ri bai honen berri eman zaio
baina zinegotzi hau ez dela bertaratu eta beraz puntu hau mahai gainean gelditzen dela.

II.- AURREKO AKTA.-

Jarraian bertaratutakoen onespenera aurkezten da 2004ko urtarrilaren 29an egin-
dako bilkurako akta.

Olaso zinegotziak (PP) esaten du aktaren haseran "aktan adieraziko da Inazio Es-
tensoro Eskisabel eta Angel Olaso Villalba zinegotziak bertaratzen direnako unea" esaten
dela, baina gero ez dela adierazten.

Idazkariak erantzuten dio baietz adierazten dela, Angel Olaso bertaratzen deneko unea ALKATETZAREN EBAZPENEN BERRI EMATEA puntuaren amaieran eta Inazio Estensoro Eskisabel zinegotzia bertaratzen deneko unea GALDERA ETA ERREGUAK puntuaren lehenengo galderaren erantzunaren ondoren.

Olaso zinegotziak esaten du noiz, zein ordutan ez dela jasotzen.

Idazkariak erantzuten dio zinegotziak bertaratzen direnako ordua ez duela inoiz jaso izan aktan.

Olaso zinegotziak esaten du baita ere funtzionarioaren gaia jasotzen den puntuan, non ordezkoa dagoela jasotzen den, esaten du hori ez dagoela erabat argi ze berak esan zuela plaza hori ez zegoela hutsik beti okupatuta egon zelako.

Idazkariak erantzuten dio abenduko Osoko Bilkuran tratatutako gai bati buruz ari dela eta ez urtarrileko Osoko Bilkuran, esaten dio baita ere urtarrileko Osoko Bilkuran, galdera eta erreguetako puntuan gai horri buruz orain esan duen gauza bera esan zuela eta hala jasota dagoela.

Eztabaida honen ondoren, onarpenera jartzen da aurreko bilkurako akta eta Osoko Bilkurak, aldeko hamar botu (EAJ, EA, PSE-EE) eta aurkako botu batez (PP), berau onartzea erabakitzen du.

III.- ALKATETZAREN EBAZPENEN BERRI EMATEA.-

Ondoren Alkateak azken Osoko Bilkuratik gaur arte emandako Alkatezaren Ebazpenen berri emten du, ebazpen hauen zenbakizko laburpen baten bidez.

Serna zinegotziak (PSE-EE) ebazpen baten datan akats bat dagoela ze 2004ko azaroko data jartzen du eta bere zuzenketa eskatzen du.

Osoko Bilkura jakinaren gainean gelditzen da.

IV.- FUTBOL ZELAIKO LANEN KONTRATAZIO ESPEDIENTEA.-

Jarraian Osoko Bilkuraren onarpenera jartzen da Harizti-Haundi futbol zelaiaren birmoldaketa eta aldagela berriak proiektuetako lanen kontratazio espediente eta lehia-keta deialdia egitea.

Kontratazio espediente honetan bi proiektutako lanak biltzen dira:

- ✓ Juan Azcue Toledo arkitektoak 2002ko azaroan Harizti-Haundi futbol zelai birmoldatzeko idatzitako proiektuaren lehen fasea: futbol zelai inguruko pistei eta aldagelako instalazioen akometida lanei dagokiena.
- ✓ Roberto Garcia Azpirik eta Ana Ezeiza Agirre arkitektoek 2003ko uztailean idatzitako Futbol Zelaiko aldagela berrien proiektua.

Kontratazio espedientearen ezaugarri nagusiak honako hauek dira:

Lizitazio oinarria

Lizitazio oinarria BOSTEHUN MILA ETA HOGEITA HAMAR MILA Euro (530.000,00€), B.E.Z.a barne, beheruntz hobetu daitekelarik.

Burutze epea

Kontratu honen xedea diren lanen burutze epea SEI HILABETEKOA izango da eta maiatzaren 17tik azaroaren 17 bitartean egin beharko dira lanak.

Enpresa klasifikapena

Lizitazioan parte hartzeko enpresa klasifikapena ondorengo hau izango da:

C Taldea, 02 Azpitaldea, c) Kategoría

C Taldea, 04 Azpitaldea, c) Kategoría

C Taldea, 06 Azpitaldea, c) Kategoría

Esleipenerako oinarrizko irizpideak

Oinarrizko irizpideak honako hauek izango dira:

- prezio baxuena (eskaintzaren %80a baloratuko da)
- lanen burutze epea (eskaintzaren %10a baloratuko da)
- lanen programazioa: Futbol taldeen denboraldia irailaren erdialdean hasiko denez, nahiz eta aldagelak bukatu gabe egon futboleko jolasteko moduan egon behako du futbol zelaia. (eskaintzaren %10a baloratuko da)

Kontratazio espedientea presakazko prozeduraz izapidatzea planteatzen da.

Guzti honen aurrean Osoko Bilkurak, bertaratutako bere partaide guztien aldeko botuarekin, espediente kontratazioa onartu eta lehiekatarako deialdia egitea erabakitzen du.

Une honetan Inazio Estensoro Eskisabel zinegotzia bertaratu da.

V.- MANU AZKARATE TOLOSA PRESOAREN INGURUKO MOZIOA ETA MOZIO ALTERNATIBOA.-

Irantzu Amundarainek, Areriaren izenean izenpetutako mozioak honela dio:

“2004ko urtarrilaren 14an Manu Azkarate Tolosaldeko preso politiko ohia atxilotu zuten Martuteneko espetxean, gizarte laguntzailearengana ohiko hitzordura agertu zenean.

Jakina da, Manu Azkarate 1992an gaixotasun sendaezin eta kroniko bat duelako geratu zela baldintzapeko askatasunean orduko kode penaleko 60 artikulua eta egungo 92 artikuluen babesean. Bere espetxealdiko azken garaian denbora gehiago pasatzen zuen ospitalean presondegian baino, eta makina bat ebakuntza ere jasan izan behar izan ditu preso zegoela eta baldintzapeko askatasunean egonik ere. Bestalde, medikazio oso hertsia du eta beste edozein pertsonak baino zaintza handiagoa behar du elikadura aldetik ere.

Ondorioz, eta bere gaixotasunaren ezaugarriak kontuan izanik, kartzelaratzeko izan dezakeen eragin izugarria da, sor diezaiokeen kaltea itzulezina izan daitekeelarik.

Atxiloketa honekin, Estatu Espainiarrak Euskal Herria eta bere eskubideen alde lanean ari diren guztiak suntsitzeko hartu duen erabakia agerian utzi du beste behin ere.

Berriz ere, herri eta herritar gisa ditugun eskubide kolektibo eta indibidual guztien gaine-
tik, indarraren arrazoia geratzen da agerian Estatuaren aldetik.

Manu kartzelaratzeko mahai gainean jarri dituzten aitzakiak, horixe, banan bana funtsik gabe erortzen diren aitzakiak besterik ez dira. Oso ondo dakite espetxe zaintzatik eman dituzten argudioak hutsalak direla, ez direla egia eta hori argitzeko frogak beraien eskue-
tan daudela.

Manu Azkarateri eta bere ingurukoei bizitzeko tokatzen ari zaien une larri hauetan, osoko Udal Batzar honek, honako puntu hauek onartzen ditu:

1. Manu Azkarateren berehalako askatasuna exijitzen du Udal honek.
2. Atxiloketa honen ondorioz bizitzen ari diren une latz hauetan Udal honek, Manu Azka-
rate bera eta bere senitartekoei elkartasunik beroena adierazten die.
3. Udal honen ustez, Manuren atxiloketarekin herri hau eta bere herritarrek dituzten es-
kubideen aurrean estatu espainiarrak bere mespretxurik handiena utzi du agerian:
Gaixo sendaezin bat gezurrezko argudioekin kartzelan sartuaz, bere bizitzak duen
arriskua axola gabe.
4. Udal honek, Manuren atxiloketaren aurrean hainbat alderdi eta komunikabideek duten
jarrera salatu nahi dute, gertaeraren larritasuna isildu eta beste alde batera begiratzen
dutelako.
5. Manu Azkarateren askatasuna exijitzeko elgarretaratze bat konbokatzen du Udal ho-
nek, eta helburu horrekin egingo diren gainontzeko mobilizazio guztietan parte hartze-
ko deia egiten die herritarrei."

Alkateak izenpetutako mozio alternatiboak honela dio:

"2004ko urtarrilaren 14an Manu Azkarate Tolosar preso ohia atxilotu zuten Martuteneko
espetxean, ohiko hitzordura agertu zenean.

Guztiok dakigu Manu Azkarate 1993an gaixotasun sendaezin eta kroniko bat duelako ge-
ratu zela baldintzapeko askatasunean orduko kode penaleko 60 artikulua eta egungo 92
artikuluaren babesean. Bere espetxealdiko azken garaietan denbora gehiago pasatzen zu-
en ospitalean presondegian baino eta makina bat ebakuntza ere jasan izan behar izan ditu
preso zegoela eta baldintzapeko askatasunean zegoela ere. Bestalde medikazio oso her-
tsia duela ere jakina da eta beste edozein pertsonak baino zaintza handiago behar du eli-
kadura aldetik ere.

Atxiloketa asko izaten dira mendeku kutsua hartzen dutenak baino Manuren kasua bene-
tan muturrekoa da. Zergatik atxilotu duten? Hileko hitzordura agertu omen ez zelako, eta
noiz atxilotu dute? Hurrengo hitzordura agertu denean. Kasu honetan mendekua ezkuta-

tzen ere ez dira saiatu, argi eta garbi, nabarmen adierazi dute nahi dutenean edonor sar dezaketela kartzelara, nahiz eta gaixotasun sendaezin eta kroniko bat izan.

Ondorioz, Manu Azkarate gose, egarri eta medikazio greban sartu da. Bere gaixotasunaren ezaugarriak kontuan izanda neurri honek bere osasunean izan dezakeen eragina izugarria da eta sor diezaiokeen kaltea zenbateraino izango daitekeen itzulezina pentsatu ere ez dugu egin nahi.

Hori horrela izanik Udal Batzarrari ondorengo akordioa hartzea eskatzen diogu:

1.- Espetxeetako Zuzendaritzari Manu Azkarate lehen bai lehen askatzea exijitzea

2.- Manu Azkarateren senitartekoei elkartasuna adieraztea une zail honetan”

Irantzu Amundarainek izenpetutako mozioa bozketan jartzen da eta Osoko Bilkurak, aldeko botorik gabe eta aurkako hamabi botuz (EAJ, EA, PSE-EE, PP) mozioa ez onartzea erabakitzen du.

Jarraian Alkateak izenpetutako mozio alternatiboa jartzen da bozketan eta Osoko Bilkurak, aldeko hamar botu (EAJ, EA), aurkako botu bat (PP) eta abstentzio batez (PSE-EE) mozio hau onartzea erabakitzen du.

VI.- BILERAREN AMAIERA.-

Eta eztabaidatzeko beste gairik ez dagoenez, Alkateak bilera amaitutzat jotzen du, iluntzeko zazpi terdiak direnean nik, Idazkariak, guztiaren akta jaso eta ziurtatzen dudalarik.